



1913-yil aprel oyidan chiqib boshlagan

Fidoyilik —
Vatanga xizmat demak!

2023-yil 4-oktabr, chorshanba,
117 (23.838)-son

**KUN
HIKMATI**

Huzuringizga
tashvish bilan
kelgan odamning
o'rniga o'zingizni
qo'yishni
o'rganing

MEHNATI QADR TOPAYOTGAN FIDOYILAR

Viloyat musiqali drama teatrida O'qituvchi va murabbiylar kuniga bag'ishlangan bayram tadbiri o'tkazildi. Tadbirga viloyatda yosh avlod ta'lim-tarbiyasi yo'lida jonbozlik ko'rsatayotgan faol ustoz va murabbiylar, mehnat faxriylari taklif etildi.



Viloyat hokimi Erkinjon Turdimov barcha ustoz va murabbiylarni bayram bilan qutladi.

- Farzandlarimiz maktabda 11 yil o'qiydi, - dedi viloyat hokimi. - O'quvchilarning shu muqaddas maskanda qay darajada ta'lim va tarbiya olishida ustozlarning his-sasi katta, albatta. Ularning bilimli, aqlli, shuningdek, o'qituvchilari va ota-onasini hurmat qiladigan, haqiqiy vatanparvar inson bo'lib voyaga yetishida sizga suyanamiz. Bu yo'lida barchangizga kuch-quvvat tilaymiz.

Tadbirda Prezident farmoniga ko'ra mukofotlangan fidoyi o'qituvchi va murabbiylarga orden va medallar topshirildi. Shuningdek, bir guruh faol ustozlar ko'krak nishonlari, faxriy yorliq va esdalik sovg'alari bilan taqdirlandi.

- Ilgari 1-oktabr kuni kasb bayramimizni paxta dalalarida nishonlardik, - deydi Urgut tumanidagi 87-maktabning boshlang'ich sinf o'qituvchisi Zamira Kenjayeva. - Bugun o'qituvchilarga berilayotgan imkoniyatlar bizni yanada fidoyilikka undamoqda. Mehnatimiz qadr topyapti. 32 yillik ish faoliyatim samarasi bo'lsa kerak, bugun bayram tadbirida II darajali "Sog'lom avlod uchun" ordeni bilan taqdirlandim.

Taqdirlash marosimidan keyin viloyat musiqali drama teatri jamoasi tomonidan "Yalang'to'sh Bahodir" spektakli namoyish etildi.

Bayram tantanasi "Diyo'ra" bazzmgohida bir piyola choy ustida madaniy tadbir bilan davom etdi.

To'lg'in SIDDIQOV,
Baxtiyor MUSTANOV (surat).



Markaziy Osiyo yosh ekofaollari Samarqandda

Samarqandda Markaziy Osiyo yoshlari ekologik oromgohi tashkil etildi. "Ipak yo'li" turizm va madaniy meros xalqaro universitetida dastur doirasida ekologik forum bo'lib o'tdi.

Tadbirda Qozog'iston, Tojikiston, Turkmaniston, Qirg'iziston va yurtimizning turli viloyatlaridan kelgan 60 nafardan ziyod yosh ekofaollar ishtirok etdi.

Markaziy Osiyo yoshlarining birinchi ekologik forumida Ekologiya, atrof-muhitni muhofaza qilish va iqlim o'zgarishi vaziri Aziz Abduhakimov, UNICEFning O'zbekistondagi vakolatxonasi rahbari Munir Mamedzade va boshqalar so'zga chiqib,

ishtirokchilarni qutladi.

Ta'kidlanganidek, Markaziy Osiyo ekologik muammolari tahlil qilishadi va ularni bartaraf etish bo'yicha o'z takliflarini ishlab chiqishadi. Ayni jarayonda ularga ko'mak berish uchun soha mutaxassislari ham jalb qilingan.

Besh kunlik tadbir davomida Markaziy Osiyoda yoshlar ekologik harakatini integ-

ratsiya qilish orqali mintaqaviy ekomadaniyat strategiyasi va boshqa qator loyihalar ishlab chiqiladi. Ular Birlashgan Arab Amirliklaridagi SOP 28 - Iqlim o'zgarishi bo'yicha konvensiyada taqdim etilishi rejalashtirilgan.

Dastur doirasida xalqaro ekspertlar ishtirokida seminarlar, uchrashuv va tegishli strategiya loyihasi bo'yicha muhokamalar tashkil etilishi belgilangan.

Osiyo o'yinlari:

**Sportchilarimizda
hozircha**

9 MEDAL

Xitoyning Xanchjou shahrida o'tkazilayotgan XIX yozgi Osiyo o'yinlarida 45 mamlakat sportchilari bellashmoqda. Musobaqalarda 32 ta olimpiya va 6 ta noolimpiya sport turi bo'yicha O'zbekiston delegatsiyasi tarkibida 390 nafar sportchi ishtirok etmoqda.

(Davomi 3-sahifada) >>>



Kinoijodkorlar taqdirlandi

2-oktabr kuni Samarqand shahridagi "Boqiy shahar" majmuasida "Ipak yo'li durdonasi" XV Toshkent xalqaro kinofestivalining tantanali yopilish marosimi bo'lib o'tdi.

Marosimda ikki karra Oskar mukofoti sohibi, "Yetti", "Qog'ozli uy" filmlaridagi rollari bilan mashhur amerikalik aktyor Kevin Speysi hamda o'zbek tomoshabinlariga "Taksi" filmidagi ijrosi bilan tanish bo'lgan fransiyalik aktyor Sami Naseri, shuningdek, 400 ga yaqin jahon va o'zbek kinoyulduzlari, kinoijodkorlar, aktyor va aktrisalr, rejissyor va kinooperatorlar, prodyuser va kinotanqidchilar, kinoshunos olimlar ishtirok etdi.

Kinematografiya agentligi direktori Firdavs Abduxolliqov barchani muvafiqiyatli o'tkazilgan yana bir festival bilan tabriklatdi. Samarqand shahri haqida tayyorlangan lavha namoyish etildi. Shundan so'ng turli yo'nalishlarda eng yaxshilar taqdirlandi.

Eng avval keyingi yillarda Samarqandda suratga olingan yoki ko'hna shahar hayoti bilan bog'liq filmlar ijodkorlari "Samarqandda qovun tarovati" kinokartinasini rejissyori Ali Hamroyev hamda "Matonat" hujjatli filmi rejissyori Shuhrat Mahmudov sahnaga taklif etildi.

- "Matonat" filmini kinematografiya agentligi va Samarqand viloyati hokimligi bilan hamkorlikda suratga olganmiz, - deydi filmi rejissyori SH.Mahmudov. - Bugun ushbu filmning xalqaro darajada e'tirof etilgani bejiz emas. Film ikkinchi jahon urushida qatnashgan 101 nafar o'zbekistonlik yurtdoshimiz haqida bo'lib, u urushda g'alabaga qo'shgan hisssasi hamda

Niderlandiyaning Amersfort shahrida joylashgan konslagerlarda halok bo'lgan o'zbek askarlariga bag'ishlanadi. Ularning ko'pchiligi shu ko'hna zamin - Samarqand shahrida.

Tadbir davomida jahon kinosi rivojiga qo'shgan hisssasi uchun rejissyorlar rossiyalik Aleksandr Sokurov, gruziyalik Iraklii Kvirkadze va italiyalik Piyetro Marchellolar taqdirlandi. Shuningdek, tadbir davomida Markaziy Osiyo filmlari tanlovi g'oliblari ham e'lon qilindi. Unda Tojikistonning "Fortuna" filmi festival direksiyasining maxsus sovriniga, qozog'istonlik rejissyor Maksim Akbarovning "Sahro" kinokartinasini eng yaxshi debyt nominatsiyalariga loyiq ko'rildi. "Shuvoq hidi" filmidagi roli uchun Dastan Aybek eng yaxshi aktyor, "Esimda" filmidagi ijrosi uchun Talaaykan Abazova eng yaxshi aktrisa, Darxon Tulegenov "Aka-ukalar" filmi uchun eng yaxshi rejissyor deb topildi. Hakamlar hay'atining maxsus mukofoti "Ademokaning sabog'i" filmi uchun Adilxan Erjanovga nasib etdi. Eng yaxshi film nominatsiyasida o'zbekistonlik rejissyor Shokir Xoliqovning "Yakshamba" filmi g'olib bo'ldi. Tadbirda mashhur san'atkorlarning chiqishlari tomoshabinlar e'tirofiga sazovor bo'ldi.

Yopilish marosimi oldidan kinofestival ishtirokchilari ko'hna shaharning diqqatga sazovor manzillarini ziyorat qildi. Tadbirda viloyat hokimining o'rinbosari Rustam Qobilov ishtirok etdi.

Jaasur SHUKUROV.

O'quvchilarimni fan olimpiadasiga olib chiqmoqchiman

Bu yilgi kasb bayramimiz har doimgidan ko'tarinki ruhda o'tdi. O'qituvchi va murabbiylar chin dildan qadrlandi, e'zozlandi, taqdirlandi. Ular qatorida kamtarona mehnatim Prezidentimiz tomonidan "Shuhrat" medaliga loyiq ko'rilganidan boshim osmonga yetdi. O'z kasbimga bo'lgan mehrim, shijoatim va sadoqatim yanada oshdi.

Prezidentimiz biz o'qituvchi va murabbiylarga yo'llagan tabrigida ta'lim sohasida olib borayotgan islohotlar Birlashgan Millatlar Tashkiloti Bosh Assambleyasining "Barqaror rivojlanish maqsadlari"ga uyg'un va hamohang ekanini aytgan. Bu esa soha faoliyatida to'g'ri va adolatli siyosat olib borilayotganini bildiradi.

Darhaqiqat, yangi tahrirdagi Konstitutsiyamizda ilk bor o'qituvchi maqomi belgilanib, ularga bo'lgan hurmat va e'tibor yanada oshdi. Maktabda o'qituvchi obro'ga ega bo'lsa, o'quvchilarning bilim olishga bo'lgan ishtiyoqi oshadi, ta'lim sifati ko'tariladi.

Jamiyat rivoji, mamlakat taraqqiyoti bilimli, salohiyatli mutaxassislarsiz

bo'lmasligini bugun barcha tushunib yetdi. Endi o'qituvchi qadri yana tiklanyapti, ularga bo'lgan munosabat ham. Endi o'qituvchilar ham o'z kasbidan faxr va g'urur tuyib yanada mehr-muhabbat bilan bilim berishiga, o'z ustida doim ishlashiga ishonaman.

Jahon tajribasidan kelib chiqqan holda bugun maktablarda darslik va qo'llanmalarining yangi avlodi yaratilyapti. Moddiy texnik baza yangilanyapti, mutaxassislr salohiyati yildan yilga oshyapti. O'qituvchilar yanada yuqori toifa olishga intilyapti. Xorijdan chet tili mutaxassislari jalb qilyapti. Hatto ayrim tadbirkorlar o'z hisobidan yangi maktablar qurib beryapti. Bu kabi islohotlar ta'lim sifatining yanada oshishiga xizmat qiladi.

O'tgan yili Kattaqo'rg'on tumanidagi 1-ixtisoslashtirilgan davlat umumta'lim maktabidagi o'quvchim Sevara Jahongirova ona tili va adabiyot fanidan respublika fan olimpiadasida birinchi o'rinni qo'lga kiritdi. E'tibor bersam, olimpiada g'oliblari ixtisoslashtirilgan maktab o'quvchilari ekan. Shundan so'ng oddiy maktabda ishlab, o'quvchilarni fan olimpiadalariga tayyorlashni niyat qildim. Shu maqsadda tumandagi 2-umumiy o'rta



ta'lim maktabiga ishg'a kirdim.

O'qituvchi shunday kasb egasi, unga o'zgina e'tibor va hurmat ko'rsatilsa, bor mehri va shijoatini ta'lim-tarbiya berishga bag'ishlaydi. Bu kasbda faqat fidoyilargina mehnat qiladi.

Fursatdan foydalanib, o'zbekistonlik barcha o'qituvchilar nomidan bizga ko'rsatilayotgan g'amxo'rlik va e'tibor uchun Prezidentimizga minnatdorchilik bildiraman.

Mehrididdin JAHONOV,
Kattaqo'rg'on tumanidagi 2-umumiy o'rta ta'lim maktabi ona tili va adabiyot fani o'qituvchisi.



“MAHALLA YETTILIGI”ga RAIS BOSH BO‘LADI

Fuqarolar o‘zini o‘zi boshqarishining noyob usuli – mahalla instituti azaldan chinakam milliy qadriyatlar, ezgu amallar maskani bo‘lgan. Keyingi yillarda bu institutning takomillashtirilishi natijasida davlat va jamiyat hayotida tutgan o‘rni va ahamiyati yanada yuksaldi.



SEKTORLAR ENDI BOSHQACHA ISHLAYDI

Garchi joriy etilganiga olti-etti yil o‘tgan bo‘lsa-da, sektorlar tizimida kutilgan natijaga erisha olmayapmiz. Vaholanki, viloyat, shahar va tumanlarda to‘rtta sektor uchun ham shtablar tashkil etildi, shtab a‘zolari-ning samarali ishlashi uchun zarur sharoit yaratildi, bu faoliyatning qonuniy asoslari mustahkamlandi.

O‘tgan vaqt davomida tizim jamiyatga ancha yaqinlashdi. Eng muhimi, hokim, prokuror, IIB boshlig‘i, soliq idorasi rahbari maqsadini bir yo‘nalishga – xalqni rozi qilishga yo‘naltirdi. Barcha tahlil va monitoringlar sektorlar kesimida muhokama qilinadigan bo‘ldi, ularning reytingi joriy etildi. Sektor rahbarlari mahalliy kengashlarda o‘z faoliyati yuzasidan hisobot bera boshladi. Binobarin sektor rahbarlari ham jinoyatchilikning oldini olish, soliq tushumini ko‘paytirish, aholining islohotlardagi faolligini oshirish uchun eng avvalo, bandlikni ta‘minlash, real daromadni oshirish, kam ta‘minlanganlarni qo‘llab-quvvatlash va bu borada hamkorlikda ishlash zarurligini tushunib yetishdi.

Ming afsuski, shuncha harakatlarga qaramasdan, sektorlar tashabbuskorligi va samaradorligidan ko‘ngil to‘lmayapti. Davlatimiz rahbari sohalar tahliliga bag‘ishlangan selektor yig‘ilishlarida ham bu haqda bir necha bor aytib o‘tdi. Xo‘sh, bu holatlarning sababi nimada?

Viloyat hokimligida bo‘lib o‘tgan yig‘ilishda aynan ana shu savolga javob izlandi. Unda viloyatdagi barcha sektorlar hamda tashkilotlar rahbarlari ishtirok etdi. Ta‘kidlandiki, avvalo, sektorlar shtabi a‘zolari tarkibini shakllantirishda xatoliklarga yo‘l qo‘yilgan, ya‘ni ayrim tashkilot rahbarlari shtab a‘zoliciga no‘noq yoki tajribasiz xodimlarini jalb qilgan. Buning ustiga, bu xodimlardan so‘rov bo‘lmagan, ular faoliyati tahlil qilinmagan, faqat sektor shtabi kotibigina faoliyat ko‘rsatgan.

Bu holat Samarqand shahar birinchi sektori shtabi a‘zolari bilan suhbat chog‘ida yaqqol ayon bo‘ldi. Viloyat hokimi anjuman ishtirokchilari oldida ular bilan savol-javob qildi. Ming afsuski, ular o‘z vazifalari haqida aniq gapira olmadi. Ayrimlarining esa kasb malakasi ham talab darajasida emas ekan. Demak, ular aholi talabini o‘rganish va qondirish salohiyatiga ega emas.

– Endi bunday tarzda ishlab bo‘lmaydi, – dedi viloyat hokimi E.Turdimov. – Davlatimiz rahbari qo‘ygan talabga javob berish, mahalla boshqaruvini takomillashtirishda joriy etilgan tizimni qo‘llab-quvvatlash uchun sektorlar ishini keskin jonlantirish zarur. Aholining barcha talablari, yangi loyiha va takliflar aynan sektorlar shtabida puxta tahlil qilinishi hamda ijroga yo‘naltirilishi lozim. Toki, bu shtab aholining chinakam g‘amxo‘r idorasiga, ma‘naviyat markaziga aylansin.

Yig‘ilishda sektorlar faoliyatini jonlantirishning asosiy vazifalari belgilab olindi.

Birinchi, sektorlar shtabi a‘zolari sifat tarkibi qayta ko‘rib chiqiladi. Ularga o‘z kasbining ustasi bo‘lgan, bilimdon, tafakkurli mutaxassislar kiritiladi.

Ikkinchidan, tashkilot rahbarlari sektor shtabiga jalb etilgan mutaxassislarni boshqa ishlarga yo‘naltirmaydi.

Uchinchidan, sektor shtabiga a‘zo bo‘lgan har bir mutaxassis eng avvalo, o‘z sohasi yo‘nalishida faoliyat ko‘rsatadi. U sektor hududidagi iqtisodiy, ijtimoiy ahvoldan xabardor bo‘lishi lozim.

To‘rtinchidan, sektor shtabi majlislarida birlashtirilgan mutaxassislar o‘zlariga tegishli masalalar muhokama etilganida qatnashadilar. Ayrim mutaxassislar mavsumiy jalb etilishi ham mumkin.

Beshinchidan, sektor shtabida har hafta u yoki bu masalaga bag‘ishlangan tahlil o‘tkaziladi. Unda shu hududdagi muammolar o‘rtaga tashlanadi, yechimi yuzasidan tegishli tashkilotlarga tavsiyalar beriladi. Tavsiyalar ijrosi navbatdagi yig‘ilishda, albatta, oshkora aytiladi.

Shuningdek, sektor shtabi tahlilida mahalliy kengash deputatlari, qishloq faollari, ommaviy axborot vositalari xodimlari taklif etiladi.

Viloyat hokimi bugungi kunda sektor shtablari uchun eng dolzarb bo‘lgan masalalar va ularning mohiyatini tushuntirish barobarida bu masalalarni qanday o‘rganish, tahlil qilish, yechimini topish hamda ijrosini ta‘minlash yuzasidan vazifalarni belgilab berdi. Bular eng avvalo, xorijdagi yurtdoshlarimiz bilan mustahkam aloqa o‘rnatish, qaytib kelayotganlariga ish topish, oilasiga ko‘maklashish, tadbirkorlik bilan shug‘ullanmoqchi bo‘lganlarga kredit olishda yordam berish, kichik biznes egalari faoliyatini kengaytirib, yangi ish o‘rinlari ochishda qo‘llab-quvvatlash, kam ta‘minlangan oilalardan xabar olish, shu bilan birga, har bir tadbir jarayonida odamlarning ma‘naviy-huquqiy saviyasini oshirish choralari ko‘rishdan iboratdir.

Ta‘kidlandiki, endi sektor shtabi tarkibidagi har bir mutaxassis faoliyatiga baho berish tizimi yo‘lga qo‘yiladi. Bu mas‘uliyat shu mutaxassisning nomzodini taklif etgan tashkilot rahbari zimmasida bo‘ladi. Har hafta o‘tkaziladigan tahliliy yig‘ilishlarda shtab a‘zolari faoliyati baholab boriladi.

Bundan tashqari, haftada bir marta muntazam ravishda sektor shtabida shtab kotibi ishtirokida hududdagi mahallalar faollari (mahalla raisi, hokim yordamchisi, xotin-qizlar faoli, yoshlar yetakchisi, profilaktika inspektori, ijtimoiy xodim, soliq inspektori) bilan o‘tgan hafta davomida berilgan topshiriqlar ijrosi tahlil qilinadi va yangi haftada bajariladigan ishlar belgilab olinadi.

Masalan, hokim yordamchisidan mahallada necha nafar ishsiz fuqaro borligi, sektor shtabi a‘zolari bilan birgalikda ishsizlarni ishga joylashtirishga ko‘maklashish bo‘yicha qanday ishlar bajarilgani, tadbirkorlik subyektlari va tadbirkorlik faoliyatini yo‘lga qo‘ymoqchi bo‘lgan fuqarolarga belgilangan miqdordagi kredit resurslarining ajratilayotganligi holati, muammoni kreditlarning qaytarilishi, tadbirkorlar qanday faoliyat ko‘rsatayotgani, hududdagi bo‘sh turgan binolarni tadbirkorlarga ajratish bo‘yicha qanday muammolar mavjudligi, xonadonbay o‘rganish holati kabi masalalar so‘raladi.

Shu tarzda mahalladagi “ettilik” faoliyati ham muvofiqlashtirib boriladi va bu pirovardida sektorda ish samaradorligini oshirishga xizmat qiladi.

Farmon TOSHEV.



Mergancha mahallasida yashovchi Subhon Egamov o‘ziga tegishli bo‘lgan binoni ta‘mirlab, tikuvchilik sexi ochdi. Korxonada ishsiz uy bekalar, “Ayollar daf-tari”dagi xotin-qizlar ish bilan band.

- Xayrli ishga qo‘l urdik, – deydi S.Egamov. - Yangi sexda tikuvchilikka qiziqqan xotin-qizlarga kasb sir-asrorlari o‘rgatilishi bilan bir qatorda mijozlar uchun ham xizmat ko‘rsatiladi.

Hozircha seximizda 4 nafar xotin-qiz ish bilan ta‘minlandi. Kelgusida yangi zamonaviy tikish mashinalari keltirib, ko‘proq xotin-qizlarga tikuvchilikni o‘rgatishni niyat qildik.

Nazira HAMIDOVA, Urgut tumani.

BU FAKT!

Joriy yilning birinchi yarmida viloyat bo‘yicha **4422,1** milliard so‘mlik qurilish ishlari bajarildi. Bu o‘tgan yilning mos davri bilan solishtirilganda, **108,2** foizni tashkil qildi.

Yilning birinchi yarmida yirik qurilish tashkilotlari tomonidan bajarilgan qurilish ishlari hajmi **721** milliard so‘mni tashkil etdi. 2022-yilning shu davriga nisbatan o‘sish sur‘ati **112,4** foizga yetdi va jami qurilish ishlari hajmidagi ulushi **16,2** foizni tashkil qildi.

Viloyat statistika boshqarmasi axborot xizmati.

Sulaymon MARDIYEV.

Viloyat harbiy ma'muriy sektori, Markaziy harbiy okrug qo'shinlari qo'mon-donligi hamda Yoshlar ishlari agentligi viloyat boshqarmasi tomonidan tashkil etilgan "Jasorat maktabi" o'quv-yig'ini-ning navbatdagi bosqichi yakunlandi.

Samarqand shahridagi O'zbekiston Respublikasi Qurolli Kuchlari kichik mutaxassislarni tayyorlash markazida safarbarlik chaqiruv rezervi xizmatchilarining "Vatanga qasamyod" va "Jasorat maktabi" o'quv-yig'ini yakuni

Viloyat Matbuot uyida turli loyihalar bo'yicha grant tanlovlarida NNTlarni qo'llab-quvvatlashga bag'ishlangan davra suhbatlari o'tkazildi.

Xalq deputatlari viloyat Kengashi huzurida-gi nodavlat notijorat tashkilotlari va fuqarolik jamiyatining boshqa institutlarini qo'llab-quvvatlash jamoat fondi rahbari F.Toshev keyingi paytda nodavlat notijorat tashkilotlari va fuqarolik jamiyati institutlarining o'rni va roli, aholi o'rtasidagi mavqei oshib borayotganini ta'kid-ladi. NNTlar tomonidan taqdim etilayotgan loyihalar natijasida bir qancha muammolar hal etilib, qo'shimcha ish o'rnlari yaratilmoqda. Tadbir davomida jamoat komissiyasining xulosasiga ko'ra, 4 ta NNT va jamoat tashki-loti "Mahallalar obodligini ta'minlash, jamiyat-da sog'lom turmush tarzini va tibbiy hamda ekologik madaniyatni yuksaltirishda fuqarolik jamiyati institutlarining faolligini oshirish" nomli uchinchi tanlovda g'olib bo'lganligi aytib o'tildi. Xususan, "Jomboy tongi" gazetasi "Jom-boyni obod va musafo hududga aylantiramiz" loyihasi uchun, "Imkon" fuqarolik jamiyati-ni rivojlantirish va inson taraqqiyoti markazi sog'lom turmush tarzini targ'ib qilishda "Ma-halla-ta'lim muassasasi-oila" resurs markaz-ini tashkil etish loyihasi uchun, Xalqaro Amir Temur xayriya jamoat fondi Samarqand viloyat bo'limi "Mahallalarda milliy urf-odatlar va umuminsoniy qadriyatlar asosida ibratli kishi-lar nomlarini abadiylashtirish, xotira kechala-rini tashkil etish hamda milliy bayramlarni va

“JASORAT MAKTABI” jasoratli bo‘lishga o‘rgatadi

munosabati bilan tantanali tadbir o'tkazildi. Unda harbiy xizmatchi-lar, davlat va jamoat tashkilotlari vakillari, ota-onalar ishtirok etdi. Tadbirda so'z olgan Markaziy harbiy okrug qo'shinlari qo'mon-donining o'rinbosari polkovnik N.Qodirov va boshqalar Qurol-li Kuchlarimiz mamlakatimiz barqarorligi va taraqqiyotining mustahkam kafolati ekanligini ta'kidladi. Harbiy xizmatchilarga

yaratilgan shart-sharoit, milliy armiyani yanada rivojlantirish, harbiylarning professional tayyor-garligini oshirish borasida amalga oshirilayotgan o'zgarishlar qayd etildi. Bu yerda olingan bilim va ko'nikmalar hayot maktabi vazifasini o'tashiga ishonch bildirib, ishtirokchilarga omad va zafarlar tiladi. – O'n kun davomida tengdosh-larim bilan birgalikda harbiycha

hayot kechirdik, – deydi ishti-xonlik Jahongir Esirgapov. – Bu yerda nafaqat jismonan chiniqdik, balki tashkil etilgan turli sport mu-sobaqalari, ma'naviy-ma'rifiy tad-birlar hamda kasbga yo'naltirish-ga qaratilgan treninglarda ishtirok etib bilim va ko'nikmalarimizni yanada oshirdik. Yig'in hayotiy qarashlarimni butunlay o'zgartirdi. Kelgusida harbiy bo'lib, yurtimiz taraqqiyotiga xizmat qilishni ol-dimga maqsad qildim. Tadbirda o'quv-yig'ini davo-mida o'tkazilgan sport musoba-qalarida g'olib bo'lgan bir guruh yoshlar tashkilotchilarning diplom va sovg'alari bilan taqdirlandi. **Baxtiyor MUSTANOV.**

60 million so‘m grant olgan NNTlar orasida tahririyat ham bor



boshqa urf-odatlarini ommalashtirish uchun, xalqaro "Oltin meros" xayriya jamoat fon-di Oqdaryo tuman muassasasi "Oltin mer-os" NNT qoshida Oqdaryo tuman hokimligi madaniyat bo'limi bilan hamkorlikda milliy urf-odatlarimiz, san'at va adabiyot hamda umuminsoniy qadriyatlarimizni targ'ib etuvchi "Miyonkol navolari" nomli sayyor drama teatr truppasi va dostonchilik maktabini tashkil etish loyihalar uchun 60 million so'mdan grant mablag'larini qo'lga kiritdi. Shuningdek, tadbir davomida Savdo-sa-

noat palatasi viloyat hududiy boshqarmasi boshlig'i o'rinbosari Sobir Boboqulovning sohaga oid 9 oylik faoliyati yuzasidan axboroti eshitildi. Komissiya a'zolari tomonidan yangi takliflar bildirildi. Tadbir yakunida "Yoshlarni ma'naviy yetuk qilib tarbiyalash hamda bandligini ta'minlash-da fuqarolik jamiyati institutlarini qo'llab-quvvatlash" mavzusida davlat grantini ajratish uchun to'rtinchi tanlov e'lon qilindi. **Husan ELTOYEV.**

Osiyo o'yinlari:

Sportchilarimizda hozircha 9 medal

(Davomi. Boshlanishi 1-sahifada).

Bahslar natijasiga ko'ra, 3-oktabr holatiga O'zbekiston sport delegatsiyasi hisobidagi medallar soni 47 ta (13 ta oltin, 14 ta kumush va 20 ta bronza) ni tashkil etib, umumjamoa hisobida 5-o'rinni egallab turibdi. Medallar jamg'arish bo'yicha 1-o'rinda Xitoy, 2-o'rinda Yaponiya, 3-o'rinda Janubiy Koreya, 4-o'rinda Hindiston bormoqda. Ushbu xalqaro sport muso-baqasida 18 sport turi bo'yicha viloyatimizdan 48 nafar sportchi ishtirok etmoqda va shu kunga qadar o'tkazilgan bahslarda ular 9 ta medal (2 ta oltin, 5 ta kumush, 2 ta bronza)ni qo'lga kiritdi. Ular orasida quyidagi sport-chilar bor: **Oltin medal** - dzyudo - Diyora Keldiyor-ova; - akademik eshkak eshish (M4 dasturi) - Shehroz Haki-mov, Davronjon Davronov, Dilshodjon Xudoyberdiyev. **Kumush medal** - akademik eshkak eshish (M2 dasturi) - Shehroz Hakimov va Dilshodjon Xudoyberdiyev; - akademik eshkak eshish (LW2x juftlik dasturi) Malika

Tagmatova; - akademik eshkak eshish (M4x dasturi) - Shahzod Nur-matov, Sobirjon Safaraliyev; - dzyudo - Davlat Bobonov; - dzyudo (jamoaviy dastur) - Davlat Bobonov va Diyora Keldi-yorova. **Bronza medal** - akademik eshkak eshish (LW2x juftlik dasturi) - Shahzod Nurmatov va Sobirjon Safarali-yev. Kechagi dasturda boks bo'yicha ayollar o'rtasida 54 kilogramm vazn toifasida ishti-xonlik Nigina O'ktamova bronza medaliga sazovor bo'ldi. 20 yoshli sportchimiz yarim finalda KXDR vakili Pang Chol Miga qarshi ringga ko'tarildi va 0:5 hisobida imkoniyatni boy berib qo'ydi. Shu tariqa, Nigina Xanchjou musobaqasini bronza medali va Parij-2024 olimpiadasi yo'llan-masi bilan yakunladi. Prezident qaroriga ko'ra, mazkur sport o'yinlarida oltin medalni qo'lga kiritgan sport-chilar 10 ming va trenerlar 5 ming, kumush medalga sazovor bo'lgan sportchilar 5 ming va trenerlar 2500, bronza med-ali uchun sportchilar 2500 va trenerlar 1250 AQSH dollari miqdoridagi pul mukofoti bilan taqdirlanadi. * * *

2024-yil Fransiyaning Parij shahrida bo'lib o'tadigan XXXIII yozgi Olimpiya va XVII Paralimpiya o'yinlariga viloyatimizdan 25 nafar sportchi ishtirok etishi kutilmoqda. Ayni paytda mu-sobaqalarga tayyorgarlik ko'rayotgan sportchilarning olti na-fari - bokschi Nigina O'ktamova, yunon-rum kurashchisi Islom Bahromov, badiiy gimnastikachi Taxmina Ikromova hamda parayengil atletika bo'yicha Husniddin Norbekov, Kubaro Haki-mova, Urganchbek Egamnazarov "Parij-2024" olimpiya o'yinlari-da ishtirok etish yo'llanmasini qo'lga kiritgan.

REKLAMA, E'LONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUROJAAT UCHUN TELEFON: 66-233-91-56

Barcha yuridik va jismoniy shaxslar, shu jumladan, chet el investorlari diqqatiga!

O'zbekiston Respublikasi Prezidentining 2023-yil 24-martdagi "Iqtisodiyotda davlat ishtirokini qisqartirishning qo'shimcha chora-tadbirlari to'g'risida"gi PQ-102-son qaroriga muvofiq, davlat va davlat ishtirokidagi korxonalarining bo'sh turgan ko'chmas mulk obyektlari hamda ulushlari "E-auksion" elektron savdo platformasi orqali sotilishi belgilangan. Shunga ko'ra, quyidagi davlat mulki obyektlari bo'yicha

SAVDOLAR E'LON QILINADI

T/r	Aktiv nomi	Balansda saqlovchi tashkilot nomi	Joylashgan manzili	Umumiy yer maydoni (ga.)	Bino va inshootlarning umumiy egallagan maydoni (kv.m)	Savdolarga chiqarilgan boshlang'ich narxi (so'm)	Savdo sanasi	Ariza berishning oxirgi muddati
1	"Bulung'ur-Kildon elita urug'chilik xo'jaligi" mas'uliyati cheklangan jamiyati ustav fondidagi 100 foiz davlat ulushi	"Bulung'ur-Kildon elita urug'chilik xo'jaligi" mas'uliyati cheklangan jamiyati	Samarqand viloyati Bulung'ur tumani, "Kildon" MFY, Ravot qishlog'i	0	0	41 870 000,0	30.10.2023 y.	30.10.2023 y.

Auksionga qatnashish tartibi to'g'risida:

Ushbu obyektlarni "E-auksion" elektron savdo platformasi orqali sotib olish Davlat aktivlarini boshqarish agentligi ayzuridagi "Elektron onlayn auksionlarni tashkil etish" AJning "e-auksion.uz" sayt maydonchasida o'tkazilishi rejalashtirilgan. Savdolar qatnashish istagida bo'lgan jismoniy va yuridik shaxslar xatlov va baholash ishlari yakunlangandan keyin "e-auksion.uz" saytida qoidalar bilan tanishgan holda ro'yxatdan o'tib, savdo jarayonlarida qatnashishlari mumkin.

Ro'yxatdan o'tgan jismoniy va yuridik shaxslar Davlat xizmatlari markazidan yoki "E-auksion" elektron savdo platformasi orqali elektron raqamli imzo sertifikatlarini olishi mumkin.

Auksionda qatnashish uchun ariza berish:

Ro'yxatdan o'tgan va elektron raqamli imzoga ega bo'lgan jismoniy va yuridik shaxs-lar "e-auksion.uz" saytida yaratilgan "Shaxsiy

kabinet"lari orqali kirib, o'tkaziladigan auk-sionlar ro'yxatidan o'ziga kerakli obyektni tanlashi va u haqida tegishli ma'lumotga ega bo'lishi mumkin. Aukcion savdosiga qo'yilgan har bir mol-mulkka tizim o'ziga xos takror-lanmaydigan LOT raqami beradi.

Aukcion savdosida qatnashmoqchi bo'lgan jismoniy va yuridik shaxslar mulk haqidagi ma'lumotlarga ega bo'lib, shu yerda ko'rsatilgan bank rekvizitlariga ko'rsatilgan zakalat mablag'ini to'lagan (to'lov hujjatida auksiondagi LOT raqami ko'rsatilishi kerak) holda aukcion savdosi-da qatnashish uchun elektron tarzda ariza berishlari lozim.

Elektron tarzda ariza berish jarayonida ishtirokchi tomonidan elektron raqamli imzo bilan imzolangan holda ariza yuboriladi. Ariza aukcion tarzda yuborilgach, ishtirok-chining "Shaxsiy kabineti"ga ariza qabul qilinganligi yoki qaytarilganligi to'g'risida javob xabari keladi. Aukcion savdosida qatnashish uchun ariza berish saytda ko'rsa-tilgan muddatda to'xtatiladi.

Aukcion jarayoni:

Ishtirokchilar tomonidan savdoda qatnashish uchun ariza berilgandan so'ng, savdo boshlanadigan kunda (vaqtda) ishtirokchilar "e-auksion.uz" saytida maxsus login va parollarini tergan holda "Shaxsiy kabinet"iga kiradi va "Kabinet"ga o'tilgan-dan so'ng "Mening auksiolarim" bo'lim-idan qatnashmoqchi bo'lgan auksiolini tanlaydi.

Shunda dastur tomonidan "Ishtirok etishni tasdiqlash" so'raladi, ishtirok etish tasdiqlangandan so'ng savdo jarayonida ishtirok etish mumkin bo'ladi (auksion sav-do o'tkazish kuni soat 10:00 da boshla-nadi).

Auksionda qatnashuvchilarga dastur tomonidan alohida tartib raqam beriladi.

Auksiinning boshlanishi ishtirokchi-lardan LOTni boshlang'ich narxdan bitta qadamga oshirilgan narxda sotib olish bo'yicha taklifni tasdiqlashni so'rashdan boshlanadi. Agar taklif berilgandan keyin 10 daqiqa davomida aukcion ishtirokchi-

laridan biri belgilangan qadamga oshiril-gan LOT narxini tasdiqlasa, keyingi taklifni tasdiqlash uchun vaqt yana 10 daqiqaga uzaytiriladi.

Agar tasdiqlangan oxirgi taklifdan so'ng 10 daqiqa davomida keyingi oshirilgan LOT narxi bo'yicha taklif aukcion ishtirokchila-rining birortasi tomonidan tasdiqlanmasa, savdo aukcion natijalari haqidagi bayonno-ma avtomatik tarzda shakllantirilgan holda yakunlanadi. LOT narxi bo'yicha taklifni oxirgi tasdiqlagan ishtirokchi aukcion g'olibi deb topiladi. Shundan so'ng ishtirokchi-ga g'oliblik bayonnomasi topshiriladi yoki ishtirokchi bilan kelishgan holda pochta orqali yuboriladi.

Savdolar natijalari bo'yicha g'oliblik bayonnomasi Davlat aktivlarini boshqa-rish agentligi Samarqand viloyati hududiy boshqarmasiga taqdim etilgan sanadan boshlab 10 kundan kechikmay oldi-sotdi shartnomasi tuziladi.

Auksionda ishtirok etgandan so'ng g'olib bo'lmagan ishtirokchilarga zakalat

pullari ishtirokchilarning elektron tarzda bergan arizalariga asosan ko'rsatilgan hi-sob raqamga qaytarib beriladi yoki keyingi savdolar qatnashish uchun o'tkazilishi mumkin.

Qo'shimcha ma'lumotlarni olish uchun manzil:

Samarqand shahri Kamol Otaturk ko'chasi, 21-uy. Davlat aktivlarini boshqarish agentligi Samarqand viloyati hududiy boshqarmasi (Davlat aktivlarini sotishga tayyorlash va sotish ishlari muvofiqlashtirish bo'limi).

Ma'lumot uchun telefonlar:

+99866-233-96-64, +99899-447-17-54.

Faks: +99866-233-73-54.

Facebookdagi rasmiy sahifa:

Sam Dav Aktiv

Veb-sahifa: privatization.davaktiv.uz Internet tarmog'idagi veb-sayt: samarqand@davaktiv.uz

BEKOR QILINADI

Samarqand tumanidagi "NAVRAS KAXRAMON" mas'uliyati cheklangan jamiyatining (STIR: 307916769) dumaloq muhri va burchak tamg'asi yo'qolganligi sababli bekor qilinadi.

* * *

Toshkent shahri Mirzo Ulug'bek tumanidagi "WORK-SPACE" mas'uliyati cheklangan jamiyatining (STIR: 308416259) dumaloq muhri va burchak tamg'asi yo'qol-ganligi sababli bekor qilinadi.

* * *

Samarqand tumanidagi "NOZIMA GANJINA SHOXINA" mas'uliyati cheklangan jamiyatining (STIR: 306906987) dumaloq muhri va burchak tamg'asi yo'qolganligi sababli bekor qilinadi.

Farhod Jo'raqulovich notarial idorasiga murojaat etishlarini so'raymiz.

Manzil: Payariq tumani Chelak shaharchasi, Is-tiqloq ko'chasi, 76-uy.

* * *

Samarqand shahrida xususiy amaliyot bilan shug'ullanuvchi notarius Norqulov Alisher Toshbol-tayevich notarial idorasida marhum Bagirov Turabga (2013-yil 18-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Norqulov Alisher Toshboltayevich notarial idorasiga murojaat etishlarini so'raymiz.

Manzil: Samarqand shahri Firdavsiy ko'chasi, 85-uy.

* * *

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna no-



RAIS BOBO

JONIQLUL YUSUPOV SHU NOM BILAN TANIQLI BO'LGAN

O'z davrining taniqli paxtakori, pastdarg'omlik dongdor rais, Mehнат Qahramoni Joniqlul Yusupov yashab o'tganiga 35 yildan oshdi. Ammo u kishining nomi nafaqat Samarqandda, balki respublikamizda hamon mashhur, amalga oshirgan xayrli, ezgu ishlari, odamlarga qilgan yaxshiliklari davralarda tez-tez eslanadi.

QAHRAMONLIKKA MUNOSIB INSONLAR

Yaqinda qishlog'imizda o'tgan ma'rakada ham shunday bo'ldi. Yoshi ulug' otaxonlardan biri gap boshladi:

- Joniqlul aka u yog'i Moskva, bu yog'i respublika rahbariyati bilan gaplashadigan juda katta salohiyatga ega rais bo'lsa-da, oddiy odamlar bilan oddiy kishilardек suhbatlashar, birgalikda har qanday ishni o'zi bosh bo'lib bajarib ketaverardi. 1970-yillarning boshi edi adashmasam. U kishi rais bo'lgan Karl Marks nomli xo'jalikni yanada kengaytirish uchun dasht hududdagi yerlar o'zlashtirilgan bo'lib, bu maydonlarga ekilgan g'o'za nihollari begona o't bilan qoplandi. Joniqlul aka darhol qishloqlarda yashayotgan odamlar va kolxoz ishchilarini o'sha joyga jalb qildi. Ammo yo'l uzoq, kolxozda bittagina "bortovoy" mashina bor, traktorlar katta xo'jalikning boshqa ishlaridan ortmaydi. Shunda Joniqlul aka mashinasini chopiqchilarni dalaga olib borishga berib, o'zi xo'jalik idorasidan 5-6 kilometr olisda bo'lgan kolxoz fermasiga piyoda jo'nadi.

Yaxshi eslayman, o'shanda qishloqda qo'lga biror marta ketmon olmagan kishilar ham raisning mashinasiga minishga qiziqib, dalaga borgandi. "Bortovoy" va raisning mashinasi 4-5 marta odamlarni dalaga eltdi. Tushga yaqin "bortovoy"dan dalaga qozon-o'choq, samovar va katta novvos, raisning mashinasidan esa non va meva-chevalar tushirildi. Shu kuni ishchi va hasharchilarga tushlikka katta dasturxon yozildi. Joniqlul akaning o'zi kechgа yaqin dalaga keldi va ayollaru qizlarga ertaga tongdan yana chopiqqa kelishlarini tayinlab, mashinalarda uylariga jo'natdi. O'zi kechqurun biz, kolxozning 50-60 chog'li ishchi va hasharchilari bilan qolib, qizg'in suhbat qurdi, hazil-huzul hangomalari bilan odamlarni kuldirib, charchog'ini chiqardi. Ertalab hammani ishga chorlarkan, "Dalada kesakni yostiq qilib, pashshaga talanib yotishning ham o'ziga yarasha gashti bor-da, azamatlar", degandi.

Joniqlul akadek fidoyi raisning bu gapi hali-hanuz qu-log'im ostida jaranglaydi. Qaniydi, bugun ham shunday samimiy insonlar bo'lsa...

Davranning to'rida o'tirgan ikkinchi otaxon suhbatni davom ettirdi:

- Samarqand oblast partiya qo'mitasining birinchi kotibi Vladimir Qodirov haqida eshitgan chiqarsizlar. U kishi haqgo'y va talabchan rahbar edi. Obkom bo'lib ish boshlagan dastlabki paytlarda yonidagilar Joniqlul Yusupov haqida turli bo'hton gaplarni aytibdi. Qodirov tushga yaqin xo'jalikka borar ekan, bu haqda na viloyat qishloq xo'jaligi boshqarmasi, na tuman partiya qo'mitasiga xabar qilgan. Maqsadi - Joniqlul Yusupov va ayrim brigada boshliqlarining nima ish bilan mashg'ul ekanliklarini hech kimga bildirmay bilib olish va shunga qarab, xulosa qilish bo'lgan.

Idoraga kelsa, rais yo'q. "Biror joyda dam olib yotgandir", degan fikrda jahl bilan xo'jalik dalasiga yo'l olibdi. Uzoqdan "Villis UAZ"ni ko'rib, shofyoriga o'sha tomonga haydashni buyuribdi. Borsa, Joniqlul aka suvchi bilan birga yengini shimarib, katta ariqqa band tashlayotgan, haydovchisi esa ariq suvini to'sish uchun oldinroqqa "Villis"ning zaxira ballonini tashlab turgan ekan. Vladimir Qodirov valloamat raisning bunday ish qilishini kutmaganligini sezdirmasdan, u kishiga:

- Yana bir suvchini chaqirsangiz bo'lmaydimi? - debdi.

- Boshqa suvchining o'z ishi bor-da, Vladimir Nikolayevich. Qolaversa, ular kelguncha bir ariq suv boshqa paykallardagi jo'yaklarni ham urib ketadi, - deb javob beribdi.

So'ngra viloyat rahbari raisga "Boyto'ra Ko'makov degan qahramon brigada boshlig'ingiz bor ekan. Yuring-chi, shu brigadadagi ishlar bilan ham tanishaylik", debdi. Joniqlul aka "Bajonidil" deb, u kishini o'sha brigadaga boshlabdi. Borishsa, ayni kun qizigan paytda ikki kishi telejkadan qoplangan mineral o'g'itni tushirayotgan ekan. "Nega bu bechoralarni tushlik paytida, shunday issiqda ishlatyapsizlar? Brigada boshlig'ining o'zi qani?", debdi V.Qodirov jahl bilan. Joniqlul aka "Boyto'ra, ishingni qo'yib, bu yoqqa kel. Viloyat rahbari sen bilan tanishmoqchi", deya uni yoniga chorlabdi. U kelgach, V.Qodirov ishlayotgan haligi kishilardan biri ilg'or brigada boshlig'i Boyto'ra Ko'makov ekanligini bilgach, brigada yetakchisining o'zi "dori" tushirayotganiga hayron qolib, "Yoningizdagi kim?" deya so'rabdi, xolos. Boyto'ra aka "Tabelchim, tush payti ishchilar dam olishi kerak. Shuning uchun tabelchim bilan shuni tushirib jo'ya-qolaylik, deya harakat qilib yotgandik", debdi.

So'ng viloyat rahbari Joniqlul akani chetga tortib, "Ha, qahramonlikka munosib odam ekan, sizga ham, brigadiringizga ham sovg'am bor", debdi. Shundan uch kun o'tmay, V.Qodirov Boyto'ra akaga yengil avtomobil, Joniqlul akaning itimosi bilan xo'jaligiga yangi kultivator sovg'a qilgan ekan.

Joniqlul Yusupov ana shunday kamtar, ishchan, serharakat, shijoatli inson edi. Shu tufayli ham u kishi el-yurtimiz hurmatini qozongan.

YOSH RAISING SHIJOATI

Yaqinda tahririyatimizga Joniqlul Yusupovning nabirasi, viloyatimizdagi idoralardan birida mas'ul lavozimda ishlayotgan Abdumalik Yusupov kelib, bobosi hayoti va faoliyati, ezgu amallariga oid ma'lumotlar, suratlarini keltirdi.

- O'zim ham ko'p davralarda bo'lganimda odamlar bobomning ibratli hayoti, ish faoliyati davomida qilgan yaxshiliklari, xayrli ishlarini aytib, hurmat va ehtirom bilan xotirlaganlariga guvoh bo'lib, ko'nglim tog'dek o'sadi, shunday insonning nabirasi bo'lganimdan faxrlanaman, - deydi Abdumalik aka.

Joniqlul Yusupov 1918-yil 2-may kuni Past Darg'om tumanining Zormon qishlog'ida tug'ildi. Ikkinchi jahon urushi boshlangach, akasi Primqul Yusupov ikkalasi bir vaqtda tengqurlari qatori ko'ngilli bo'lib frontga otlangan. Fashistlarga qarshi mardonavor jang qilgan. Urushda akasi bedarak ketgan, o'zi esa urushdan qaytgach, tumandagi "Qizil mehnat" nomli jamoa xo'jaligida oddiy ishchi bo'lib ishlagan. Shijoatlili, tashkilotchiligi va tashabbuskorligi bilan jamoadoshlarining e'tiboriga tushgan Joniqlul Yusupovni 1947-yilda xo'jalikka rais etib saylashadi. Urush olis qishloqlarda ham o'z asoratini qoldirgan, mashaqqatli mehnat keksayu yosh bolalar zimmasida qolgan, xo'jalik iqtisodiyoti juda pasayib ketgandi. Texnika yetishmas, ot-ulov, ho'kiz-omoch bilan dehqonchilik qilish

Shaxs va jamiyat



oson bo'lmagan. Lekin bobom xo'jalik a'zolarini yaxshi kunlar kelishiga, ular ahillik bilan ishlasalar, ko'p muvaffaqiyatlarga erishishga qodirligiga ishonitiradi. Mayda-mayda yer maydonlari kengaytiriladi. Yangi qo'riqlar ochildi. Natijada paxta hosildorligi ortib, odamlarning turmush sharoiti yaxshilana boshlaydi.

1960-yillarda Past Darg'om tumanidagi past rentabelli mayda xo'jaliklar birlashtirilib, yirik Karl Marks nomli xo'jalik tashkil etiladi va unga Joniqlul Yusupovni rais etib saylashadi. Xo'jalik ekin maydoni 2 ming gektardan oshadi. Yirik chorvachilik va parrandachilik fermalari vujudga keladi, qudratli hamda ko'p sonli texnika parki yaratiladi.

BIR XO'JALIKDAN CHIQQAN BESH QAHRAMONNING SARDORI

- "Qayga borsam boshda do'ppim, g'oz yurarman gerdayib, olam uzra nomi ketgan O'zbekiston, o'zbekim!". Sevimli shoirimiz Erkin Vohidovning ushbu satrlarini o'qiganimda Joniqlul aka Yusupov ko'z oldimda gavdalanadi, - deydi mehnat faxriysi Abdushukur Muhammadqulov. - Gelife shimda, xrom etik kiyib, boshda do'ppi bilan katta-katta anjumanlarda o'zbekligini bildirib, o'zbekona urf-odatlar, o'zbekona andishayu o'zbekona lutf, g'urur bilan yurganligini ko'rganman.

Joniqlul aka Past Darg'omning bo'z-dasht yerlarini o'zlashtirib, paxtachilikni rivojlantirish, paxtadan mo'l hosil olishda nafaqat O'zbekistonda, balki sobiq ittifoqda ko'zga ko'rinish, ko'plab davlat mukofotlari, e'tiroflarga sazovor bo'lganligini kexsa avlod vakillari yaxshi biladi. U kishi 45 yildan ziyod bitta xo'jalikda mohir rahbar bo'lib ishladi. Rahbarlik sir-asrorlarini miridan sirigacha o'zlashtirgan, o'zi kabi dehqonchilikning bilimdonlari - Boyto'ra Ko'makov, Hamro Ergashev, Meli Qo'chqorov kabi brigada boshliqlarini birlashtira olgan inson edi.

Joniqlul aka o'sha davrning yirik davlat arbobi ham edi. Uch marta SSSR Oliy Sovetiga, to'rt marta O'zbekiston SSR Oliy Sovetiga deputat bo'lib saylanib (xalq vakili), ko'plab muammolarni hal qilgan.

1977-1988-yillarda men oblast partiya komitetining qishloq xo'jalik masalalari bo'yicha kotibi vazifasida ishlardim. Shu sababli Joniqlul aka bilan ish jarayonida ko'p marotaba uchrashganman. Oilasini yaxshi bilganman. U kishining turmush o'rtog'i Xayriniso Yusupova ham ilg'or brigada boshlig'i bo'lib ishlab, davlatimizning qator orden va medallari sohibi sifatida e'tirof etilgan.

Joniqlul Yusupov 1988-yil 28-yanvarda, 70 yoshida vafot etgan bo'lsa-da, xalq orasida "Rais bobo" degan nom bilan hurmat va ehtirom ila yodga olinadi. U kishining barchaga ibratli, mazmunli hayot yo'li va mehnat faoliyati o'sha davr va hozirgi zamon yoshlariga ham manzur bo'ladigan ibrat maktabi, desak, mubolag'a bo'lmaydi.

PAXTACHILIKDA "JONIQLUL YUSUPOV MAKTABI"NI YARATDI

- Joniqlul aka, avvalo, odamlarning ruhiyatini chuqur bilar, ularga g'amxo'rlik ko'rsatar, jamoa a'zolarini barcha bunyodkorlik ishlariga mohirlik bilan oltantiradi, - deya xotirlaydi mehnat faxriysi Saidxon Azimov. - Shuning uchun ham jamoa xo'jaligi sobiq ittifoqda dong taratgandi. Xo'jalikda 1960-1970-yillarda paxta yetishtirish 13 ming tonnagacha yetgan, har gektar yerdan 70 sentnergacha hosil olingandi.

Muhimi, "Rais bobo" nafaqat Past Darg'om yoki Samarqandning, balki butun mamlakatning faxri, g'ururi edi. Shu bois ham Moskvadan Gdlyan va Ivanov boshliq

2023-yil 4-oktabr, chorshanba

"desantchi"lar to'dasi "paxta ishi" bahonasida respublikamizga kelib, "qama-qama" boshlanganida, garchi Joniqlul aka Moskvada davolanayotgan bo'lsa-da, biror kishining nohaq, asossiz ayblanishiga yo'l qo'ymagandi.

Sharof Rashidov Joniqlul aka bilan juda qadrdon bo'lgan. Samarqandga keldi deguncha, albatta, xo'jalikka tashrif buyurar, dehqonchilikni rivojlantirish bo'yicha maslahat, yo'l-yo'riq berib ketardi. Esimda, bir gal kelganda xo'jalik ichidan o'tadigan "Samarqand - Kattaqo'rg'on" yo'lining xo'jalik chegarasida suv chiqmaydigan qaqroq dasht yerda bog' barpo etishni maslahat bergandi. Ko'p o'tmay, 30 gektarlik bog' barpo etildi, suv chiqarilib, shinam dam olish oromgohi qurildi.

U kishi g'o'za nihollarini o'z farzandidek ardoqlar, boshqalardan ham shuni talab qilardi, "Yerni, yetishtirayotgan ekingni jon-dildan sevir ardoqlamasang, ular senga hech nima bermaydi. Nomigagina, qo'l uchida mehnat qilib, o'zingni ham, yerni ham aldama, uning ham joni bor, aldaganingni his qilib turadi", derdi. Shunga amalga qilgani bois paxtachilik sohasida "Usta dehqon-paxtakor Joniqlul Yusupov maktabi"ni yaratib ketdi.

Shunday xizmatlari uchun O'zbekistonda xizmat ko'rsatgan paxtakor unvonini olgan Joniqlul Yusupov katta bir avlod paxta ustalarini ham tarbiyalagandi. Ulardan Boyto'ra Ko'makov, Hamro Ergashev, Meli Qo'chqorov, urushdan bir oyog'ini yo'qotib, nogiron bo'lib qaytgan mohir mexanizator Qurbon Orziqulov Mehnat Qahramoni unvoniga sazovor bo'ldi. Rasul Farmonov, Mar-di Yo'ldoshev, Hayit Salimov kabi paxtakorlar el nazariga tushdi. Narziqul Eshonqulov, Muxtor Sat-torova, Mansur Abduraimov, Tifli Bobonorov, Sobir Abduraimov, Ne'mat Nortoyev, Normurod Omonov, Rahmatulla Shodiye, Ulug'murod Ernazarov, Abdullai Mustanov va boshqa ko'plab kadrlari yetuk rahbarlar bo'lib yetishdi.

AKA-UKA BO'LIB ISHLAGANMIZ

- 1986-yilda meni Go'zalkent tumaniga birinchi rahbar etib tayinlashdi, - deb eslaydi mehnat faxriysi Mansur Abduraimov. - Yangi ishga o'rganib ketishim qiyin bo'lmadi. Joniqlul aka uncha-muncha raykom kotiblariga o'z ta'sirini o'tkazishini avvaldan eshitganman. Menga esa shu yerlik bo'lganim uchunmi, unday qilmadi. Aksincha, bilmagan narsalarim, kadrlar haqida tushunchalar, maslahatlar berib yordam qildi.

Tumanimiz hududida qadimiy "Oshiq ota" ziyoratgohi bor. O'sha yillar ateizmning juda kuchaygan paytlari emasmi, ziyoratgoh va yonidagi qabristonni buzish haqida ko'rsatma oldim. Markaziy Komitetdan Medvedev degani kelib, bu borada qilinyotgan ishlar bilan qiziqdi. Ziyoratgohni saqlab qolishim kerak edi. Shuning uchun Joniqlul akaga qo'ng'iroq qildim. U kishi yuqoridan kelgan vakil bilan uchrashib, nima dedi, qanday tushuntirdi, bilmadim. Har holda ziyoratgoh va qabriston buzilmay qoldi. Chunki Joniqlul akani Moskvadagi "kazo-kazo"lar ham yaxshi bilar va kezi kelganda u kishining fikrlari bilan hisoblashishar edi.

Joniqlul Yusupov bosh bo'lgan xo'jalik hamda 85-maktab uzoq yillar u kishining nomi bilan atab kelindi. Maktab hovlisi va hozirda kasb-hunar kolleji bo'lgan sobiq xo'jalik idorasida byusti o'rnatilgan. Xo'jalik markazida Joniqlul Yusupov muzeyi tashkil etilgan. Bu yerda Mehnat Qahramonlari, xo'jalik faxriylarining ibratli hayoti va mehnat faoliyatlarini bilan bog'liq eksponatlar saqlanadi. Jamoatchilik vakillari, yaqinlari, talaba va o'quvchilar, yoru do'stlarining farzandlari bu yerga kelib, xotira tadbirlarini o'tkazib turishadi.

Joniqlul Yusupovning hayoti va mehnat faoliyati haqida batafsil yozaman, desangiz, katta bir kitob bo'ladi. Biz maqolamizda bu inson bilan bog'liq ayrim xotiralarni qog'ozga tushirdik, xolos. Aslida Joniqlul bobo Yusupov ibratli hayotini, umrini ezgulikka, xayrli ishlarga baxshida etgan insonki, shuning uchun u kishining yodi, ezgu ishlari el tilidan tushmaydi.

Akram HAYDAROV.

Ulug'larning ulug'ligi ularning qilgan ishlarida ko'rinadi

Samarqand shahrida O'zbekiston Yozuvchilar va Jurnalistlar uyushmasi viloyat bo'limlari hamda Samarqand davlat universiteti hamkorligida "El, Vatan g'ami bilan yashagan inson" mavzusida adabiy-badiiy anjuman o'tkazildi.



Anjuman ulug' adib va davlat arbobi Sharof Rashidov abadiyatiga bag'ishlab yozuvchi Abduqayum Yo'ldoshev tomonidan yozilgan "Sharaf yo'li" romanini hamda shoira Sayyora To'ychievaning "Sharofnoma" dostoni taqdimoti bilan boshlandi.

Tadbirda so'z olgan SamDU rektori, senator Rustam Xolmurodov, O'zbekistonda xizmat ko'rsatgan jurnalistlar Shuhrat Jabborov, Farmon Toshev, "Ishonch" va "Ishonch-doveriye" gazetalarini bosh muharriri Husan Ermatov, mehnat faxriysi Abdushukur Muhammadqu-

lov, Jizzax shahridagi Sharof Rashidov ilmiy ma'rifiy yodgorlik uy muzeyi direktori Odil Hamroqulov Sharof Rashidovning ezgu ishlarini yodga oldilar. Aynan Samarqand davlat universiteti ham adib nomi bilan atala boshlagani faxr ekanligi ta'kidlandi. Mazkur kitoblarda Sharof Rashidovning siymosi gavdalanganligi alohida tilga olindi.

- "Sharaf yo'li" romanida Sharof otanang Samarqanddagi mehnat faoliyati alohida ochib berilgani ham nafaqat meni, balki boshqalarning ham yangi ma'lumotlar olishiga imkon berdi, - dedi

Sh.Jabborov. - Qolaversa, bu kabi asarlarni yaratishda muallifdan kuchli e'tiqod talab etiladi, aynan mazkur kitoblarda buni ko'rish mumkin. "Sharafnoma" dos-toni bu ulug' inson hayotiga chizgilar bo'lib, 156 nafar el tanigan insonlar fikrlari jamlangani bilan ahamiyatli bo'libdi. Albatta, asarda keltirilgan kichik ma'lumotlar har qanday o'quvchini o'qishga va izlanishga undaydi.

Tadbir davomida mualliflar mazkur kitoblarning yaratilish tarixini so'zlab berdi.

Husan ELTOYEV.

SHU OYDA TAVALLUD TOPGANLAR

5-OKTABR

Asliddin XUDOYBERDIYEV – 1972-yilda Urgut tumanida tug'ilgan. Xalqaro toifadagi sport ustasi. "O'zbekiston ittixori" faxriy unvoni sohibi.

Jo'raboy HAMDAMOV – (1929-2020) Andijon viloyati, Asaka tumanida tug'ilgan. Tilshunos olim.

Obloqul BOZOROV – (1932-2021) Bu-lung'ur tumanida tug'ilgan. Falsafa fanlari doktori, professor.



MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 16 441 nusxada chop etildi. Buyurtma 534. Hajmi 2 bosma tabaq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi. **Korxona manzili:** Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da. Bosishga topshirildi: soat 19:00



Saytimizga o'tish uchun QR-kodni telefoningiz orqali skaner qiling

Gazetaning navbatdagi soni 2023-yil 7-oktabr, shanba kuni chop etiladi.

Navbatchi muharrir:

G'.HASANOV.


Navbatchi:

X.ERNAZAROVA.

Sahifalovchi:

B.ABDULLAYEV.

ISSN-201667X



Sotuvda narxi kelishilgan holda